

東
華
續
錄

東華續錄

臣周潤蕃恭校

嘉慶十五年庚午春正月丙辰朔以瑞雪時晴予在京文武官員加級紀錄有差○丙寅諭本日據祿康奏懇將失察書吏冒領庫項降革司員槩予捐復此不可行該員等甫經部議若遽令捐復原官非惟不足示懲抑且迹涉言利有此政體乎但向來內務府降調人員仍留本衙門補用此案戶工二部司員同時降調者甚多伊等獲咎尙屬因公除革職治罪各員無庸議外其降調各員著加恩比照內務府之例准其各留本部行走以所降之級遇有相當缺出酌量奏補○己巳諭向來分部行走人員三年期滿例應由各該堂官秉公考察分別去留原爲覈實程材之道經朕節

次降旨諄諄訓飭乃近日各部院堂官於學習人員報滿時往往以該員等行走已歷三年一經激汰未免缺望遂爾槩行保留藉以沽名釣譽殊不思各部院大臣經理政務自應綜覈名實以公事爲重各司員有分理庶事之責總當視其人之才具能否勝任不可曲徇人情多爲遷就且該員等甄別改用之後亦尙有官可補不至終於廢棄又何所用其瞻顧耶嗣後各該堂官務於行走人員隨時留心察看報滿時將應去應留秉公覈實甄別毋涉冒濫以副朕激敘官方至意○庚午諭軍機大臣等百齡奏派員出關傳詢南掌國酋長召溫猛出奔遷徙情形一摺據稱召溫猛巽懦無能不克凝承錫命不卽聲罪已足示矜恤亡酋今流寓夷邦止可聽其去住等語所見甚是召溫猛前於乾隆五十九年請封時已在播遷之際迨祇受敕印後又未能返其國都力圖恢復止

在外潛匿流徙越南國境且於召蛇榮設謀害時倉卒逃遁竟致遺棄敕印似此懦弱不振豈能復掌國事伊旣與阮福映有舊自應聽其在越南國居住著百齡傳諭阮福映以召溫猛旣受錫封不克自立展轉播遷棄天朝敕印本有應得之罪姑念其流離失所不加聲責但內地不應收留應聽越南國自爲安置至所稱南掌國於嘉慶五年十年進貢係何人僞託請交滇省督臣查覆一節該國虔修職貢有年並無得罪天朝之處此時亦可不必逐細追究也○辛未刑部侍郎金應琦以巡撫山西時失察屬員貪劣降三品京堂○乙亥增廣東廣州駐防漢軍養育兵一千一百餘名○以兵部尙書劉權之協辦大學士○以德泰爲廣西按察使由員外郎遷○丁丑調秦瀛爲刑部右侍郎轉萬承風爲兵部左侍郎以賈淳爲兵部右侍郎○庚辰命勒保爲武英殿大學士○

辛巳諭刑部等衙門奏審擬王府太監李來喜串通書吏韓振邦捏造匿名揭帖訛詐本府親王一案近日諸王咸知謹守法度不敢驕縱妄爲莊親王縣課人亦謹飭此案太監李來喜係其本府家奴膽敢因貧起意憑空捏造姦私重情勾結外人向本府親王訛索實屬刁惡異常且據供縣課素日並無將伊磨折酷虐情事而該犯任情反噬干名犯義莫此爲甚國家紀綱嚴肅如王等實有違禁亂法款蹟經大臣科道糾參自必按法懲治若以奴告主名分攸關律嚴犯上從前乾隆年間縣德與秦雄褒結交經太監王忠卿匿名訐告訊問屬實 皇考高宗純皇帝將縣德治罪仍將王忠卿按律絞決今李來喜造言污讟縣課各款審係全虛情罪尤重李來喜著卽處絞派刑部侍郎朱理前往監視先將該犯於法場重責二十板再行正法並著親郡王等各將本府太監內

擇素不剛良者一二人遣往環觀俾知儆懼至韓振邦見充都察院衙門書吏平日與王府太監交往已屬不安本分茲復敢朋謀勾結編造匿名揭帖徑詣王府訛索親王不法已極近來部院各衙門書吏目無法紀作奸犯科肆無忌憚上年甫經辦理王書常等冒領庫款一案乃爲時未久又有此奸胥圖詐之事可見伊等刁猾性成啓不畏法不可不嚴辦示懲原擬韓振邦著卽照投隱匿姓名文書告言人罪絞監候律絞監候秋後處決餘依議○甲申諭軍機大臣等前因江南吏治民風積習因循必須大加整頓松筠居心公正辦事認真是以特由陝甘簡調前往該督管理三省事務殷繁一切察吏安民整頓營伍以及漕河鹽關等事無一不歸統轄則無一不應經理河工特係所管一事以職任而論則總河係屬專辦總督止係兼管以見在情形而言則吳璥徐端經

理河務有年尙無把握松筠焉能如伊等之熟練詎可師心自用
乎松筠惟當於河督呼應不靈之處協力幫助俾免掣肘設其辦
理不妥則隨時查察糾劾至於應辦事宜惟有與之和衷商推廣
咨博採期於相與有成今松筠甫入江境未經履勘河工卽有前
日引沁入衛之奏朕披閱時卽覺其事有格礙因其既有此議姑
發河東總督等詳悉議奏本日閱陳鳳翔覆奏之摺詳查舊案敘
述形勢甚爲明晰從前康熙六十年及乾隆元年均會有此議俱
經彼時熟習河工之大員勘明停止且彼時亦僅欲引沁入衛若
依松筠所奏是又欲於入衛之後引之自北而南以圖濟運此無
論沁水挾沙帶泥慮致淤墊並沁隄衝決之後有礙各處田廬且
以地勢而言又豈能強令南趨非但多糜帑金亦斷無此辦法松
筠或係誤聽人言不加詳察率爾陳奏所見甚左此時南河正當

吳緊之時設松筠到彼均如此誤出主見而吳璫等見伊係特簡調任之人亦卽讓其主持觀望推諉一有貽誤則松筠之獲戾甚重彼時卽加以懲治於公事又奚益乎松筠前奏冒昧著傳旨申飭嗣後河工事務自當由河督專政伊隨時悉心商酌妥協共濟期於經理有益將此各傳諭知之

二月己丑 上御經筵○諭向例臨御經筵升殿及宣講後講官同侍班各官均於文華殿丹墀內行二跪六叩禮丹墀中亘甬道兩旁行禮之處殿內不能俯矚嗣後著改於丹陛上分左右行禮○辛卯諭三載考績爲朝廷激揚大興每屆京察之期擇其勤奮供職者施恩予以甄敘各大臣三年中偶有小過原可置之不論而其疏忽尤甚者亦不可不加以儆惕本年京察吏部開列在京各部院大臣各省督撫名單請旨甄別朕詳加酌覈所有上屆京

察會經議敘之大學士軍機大臣等所管三庫及戶工等衙門於書吏王書常等假印冒領庫銀物料一案全無覺察非尋常玩忽可比慶桂董誥戴衢亨托津均著無庸議敘其各部院大臣亦多係獲咎加恩原宥之人並著無庸議敘內除長麟一員患病日久已另降諭旨開缺外餘俱著照舊供職至兵部尙書明亮舊有勞績此三年內伊所管兵部並無失察滋弊之處今在京各大員均未議敘亦不必將伊一人特予甄敘伊曾經三次得遇雙眼花翎俱因事拔去念其數年無過仍著加恩賞戴雙眼花翎以示眷注大學士四川總督勒保久任封圻辦事鎮靜兩廣總督百齡辦理洋匪剿撫得宜日有起色福建巡撫張師誠於海洋嚴斷接濟實心經理均著加恩交部議敘餘俱著照舊供職○諭長麟上年夏間感患目疾請假調理自朕啓蹕至熱河回鑾尙未就痊供職節

經降旨給假調養迨至冬間又經格外賞假兩月扣至本年二月初三日卽已假滿近日詢問伊兄長坊尙稱長麟瞳人已見充足初四五日便可生光屆期仍未見效朕於長麟目疾展轉賞假業經半載有餘原係體恤大臣恩意然在長麟自應以職任爲重陳請開缺乃日久遷延支飾殊乖大臣以誠事君之道卽如本日博興以患病兩旬恐誤職守奏請解任調理朕方加之憐憫不肯遽令開缺刑部事務較繁更非理藩院可比伊二人一則念切急公一則意存戀職顯而易見長麟卽著開缺在家靜養如果目疾一切復元朕必賞給差使所有刑部尙書員缺著瑚圖禮調補其吏部尙書員缺著秀林調補所遺工部尙書員缺著托津補授托津未到京以前其工部尙書事務仍著秀林兼署○轉英和爲戶部左侍郎調桂芳爲戶部右侍郎榮麟爲吏部右侍郎馬慧裕爲工

部右侍郎以貴慶爲盛京戶部侍郎

由內閣學士遷

○甲午以趙宜喜爲

河南按察使

由江蘇常鎮通海道遷

○丙申命大學士勒保來京供職以常

明爲四川總督調同興爲湖北巡撫賞孫玉庭三品頂帶爲雲南

巡撫

由翰林院編修遷

○戊戌諭近來升擢各員均於謝恩召對後方換

新銜頂帶因思廢員內有本無頂帶見在加恩錄用者若於謝恩

召對時不用頂帶進內行走殊於體制未協嗣後如無頂帶之廢

員經朕擢用著卽用新銜頂帶赴宮門謝恩備遇朕赴園進宮及

傳膳辦事之日俱於道旁扯頭後再用頂帶豫備召對著爲令○

乙巳諭向來

壇

廟大典其陪祀及執事之王公文武大員於

穿孝期內或仍當差或竟行停止未能畫一卽如太常寺官員於

乾隆年間奏明因執事乏人穿孝百日後照常供奉祭祀見在兼

光祿寺之成書又因三年服制未滿不恭捧福胙若以將事遠近

有所區別而唱贊福胙皆屬切近差使何以卽有參差若以太常寺嫺習禮儀之人較少而色克精額昨在家穿孝恭值祀典並未見讀祝乏員至會典開載官員有服制者俱不齋戒陪祀而御前乾清門大臣侍衛等並不上壇仍行扈從若應在家守制而率意當差者卽爲越禮若本應當差而在家不出者卽爲偷安種種歧異殊於體制未協著大學士會同禮部悉心妥議章程具奏尋議奏定制旗員子爲父母承重孫爲祖父母皆在家持服二十七箇月凡穿朝服等處停其行走今在壇在廟無不朝服將事視朝會宴饗禮數有加若二十七箇月內卽令其執事行走實與定制未符又文武各官有期以下服皆不與不獨三年之服爲然嗣後太常寺有服人員應行回避之處請與各衙門畫一辦理惟期服人員未便與陪祀官一例請改爲兩月不與祭其大功以下

仍照舊例得旨此後恭遇 郊 廟大典卽不上 壇入 殿之

員其持服未滿二十七月者亦一體不穿朝服毋庸扈從前往止

穿蟒袍補服送迎餘依議○丁未以多福爲內閣學士

由副部
統遷

○

己酉諭本日朕恭閱 世宗憲皇帝實錄內載雍正五年二月二

十三日 諭旨敬覽 聖祖仁皇帝實錄內康熙五十一年奉

旨山東民人出口種地者多至十萬有餘伊等皆朕黎民旣到口

外種地生理若不容留令伊等何往但不互相對閱查明將來俱

爲蒙古矣嗣後山東民人有到口外種地者該撫查明年貌籍貫

造冊移送稽查由口外回山東去者亦查明造冊移送該撫覆閱

稽查等因此事今尙行否其直隸山西民人有往口外種地者亦

照此例行否著大學士等查奏等因欽此嗣經延臣查奏以口外

種地民人於雍正元年二年三年陸續設古北口張家口歸化城

三同知管理但地方遼闊各該同知所轄恐有遺漏應令直隸山西督撫查明酌量分交管理並飭三路同知各按所管地方將寄居民人與種地民人查明姓名籍貫造冊咨查各本籍仍令各省州縣將所有出口種地民人記檔以備日後查對嗣後再有出口種地之人俱著該同知一面安插一面移咨本籍查無過犯逃遁等情准其居住耕種年終造冊報部等語當蒙 允准施行因思

口外各蒙古部落種地民人在 聖祖仁皇帝 世宗憲皇帝時

已因其人數繁多屢經 降旨設官管理立法稽查迄今又將及

百年內地民人生齒日繁出口謀生者益復加增卽原先出口之人亦復滋息日多其自雍正年間添設同知以後見又增設官若干員各寄居種地民人見在作何稽查遇有民人出口者各該地方是否記檔該口外官員等是否將有無過犯等情咨查本籍再

行安插年終是否造冊報部著該部查明覆奏尋戶部奏查古北口張家口歸化城自雍正年間設立三同知管理以後歸化城額地民人由該同知通判各按所管地界照編造保甲之例每年將舊存新到及回籍病故人數各若干註明係何州縣民人造冊咨送臣部查覈除嘉慶十四年人數尙未造報外計十三年分實在民人四千九百餘名古北口以外灤平豐甯二縣向係土著民人按冊輸糧熱河迤北一帶係蒙古外藩游牧處所自乾隆四十三年改設州縣以後民人集聚漸多山廠平原盡行開墾均向蒙古輸租有家貲稍裕搬移眷屬者亦有偶值歉收投親覓食者張家口地方偏僻關外東西兩溝雖有山坡墾種地畝無多數十里外卽係游牧草地並無可開墾亦無村落商販往來俱由都統衙門給與照票其餘隻身出入民人亦俱取具關內鋪戶保狀方准放

行此山西撫臣造報臣部各關口造報兵部查覈之原委也至古
北口張家口外寄居種地民人見在作何稽查未據咨報口外官
員等是否將有無過犯等情咨查原籍再行安插之處歸化城並
古北張家二口外均未咨報應請旨敕交直隸總督山西巡撫查
明妥爲安置按年造冊報部查覈從之○庚戌諭前據山東河東
道劉大觀參奏初彭齡在山西巡撫任內任性乖張各款特派托
津穆克登額前往查辦並令初彭齡回至山西聽候質詢茲據托
津等按款確查分別虛實各取親供進呈請將初彭齡交部嚴加
議處劉大觀交部議處並其餘案犯一併定擬具奏朕詳加酌覈
尙有未盡平允者上年金應琦患病請假派令初彭齡前往署理
山西巡撫伊陞辭時朕並未降旨令其密查金應琦任內有何款
蹟乃伊到晉之後遇事搜求動形白簡計前後數月所參司道府

縣等官爲數實屬不少其中固有實在應參者而其偏執己見任情憎惡率行糾參者亦正不免今閱托津等查奏各款其最甚者如金應琦查看號簿卽行嗔斥一款試思金應琦不過暫時患病之員並非解任去官不應妄行干與者可比伊查看號簿正係留心公事初彭齡自應將應辦之事與之商榷方爲和衷集益何至遽加憎惡甚至向司道前指斥其非是其居心實屬褊淺至於試用知縣陶榮淦之死固緣賊私敗露畏罪輕生而該員身係職官何得隱而不奏此一節亦屬疏漏且旣知朱錫與辦事不妥已向司道告知並不卽時參辦不免有瞻徇情事初彭齡著照托津等所奏交部嚴加議處仍令回陝西本任聽候部議俟議上時再降諭旨至河東道劉大觀參奏初彭齡各款其最重者如稱初彭齡刪減諭旨一事如果屬實則初彭齡之罪甚大見在查明初彭齡

上年奏請將伊門生徐承慶升補汾州府時於接奉申飭諭旨後當經給署藩司劉大觀臬司積朗阿公同閱看不過行司札內未經鈔黏止於遺漏實無刪減諭旨情事又所稱陶榮淦之死因初彭齡偏聽朱錫庚之言撤回省城欲行參革旋至自縊一節如果屬實案關重大今查明陶榮淦委係畏罪自盡是所告重事均屬不實又如所參平定州徐承慶虧空一事見據劉大觀自稱前次得自風聞此時會同盤查方知不實等語伊以本省之官言本省之事何得隨意入奏謾之風聞乎劉大觀於初彭齡分居僚屬當初彭齡在山西時既覺其辦事乖謬卽當隨時勸阻乃不面加匡正轉一一默誌其短待其去任之後加以參劾此非因初彭齡有將伊劾奏之處借此報復卽係晉省怨恨初彭齡之人紛紛向其從違伊遂不顧虛實冒昧臆參此等攻訐上官之風亦不可長托

津等僅請將該員交部議處所議尙輕劉大觀亦著交部嚴加議處卽來京候旨餘著該部議奏尋議上得旨初彭齡著加恩以四品京堂補用就近侍養其親劉大觀著照部議革職○壬子諭軍機大臣等治河所以利漕東南數省漕糧上供天庾是必運道通暢方能源源轉輸近年河工敝壞而漕運亦日見阻滯推原其故其始因河湖多故此衝彼漫逐處淤墊以致運道節節梗阻有礙船行繼又因漕務緊要不能須臾停待每值回空重運相繼而行催趲不遑更無修防之暇引黃濟運爲害滋深故無一日不言治河亦無一年不虞誤運欲求兩治轉致兩妨殊爲慮慮從前康熙年間曾因辦理河工停運數次始能經理獲效然彼時京通各倉儲積充裕足備數載之需非如目下情形每年僅敷支放可比揆之事勢欲倣照辦理蓋有所難但先事之虞豈可漫無籌畫前吳

璦曾有由清江陸轉之議而費重事繁礙難經理溯查元明時本有海運之法後因積久弊生遂議停止然其始轉輸利賴未嘗不有裨國計此時亦並非輕言改易惟未雨綢繆不得不作萬一之想設竟須計出於此若不先爲試辦豈可冒昧徑行聞江浙各海口本有商船赴關東一帶販運糧石者每年絡繹不絕其船隻習於風濤熟於沙綫該二省均有出海之路著松筠章煦蔣攸銘體察情形或將本年漕米就近酌交商船灑帶若干先爲試行以觀成效不妨使商船略需微利俾各踴躍承辦一面仍催趲重運北來總期於運務有備無患是否可行該督撫卽熟籌妥議據實具奏

三月丙辰諭慶桂等奏據廣甯門巡役人等盤獲楊姓身藏鴉片煙六盒請交刑部審辦一摺鴉片煙性最酷烈食此者能驟長精

神恣其所欲久之遂致戕賊軀命大爲風俗人心之害本干例禁該犯楊姓膽敢攜帶進城實屬藐法著卽交刑部嚴審辦理惟此項煙斤近聞購食者頗多奸商牟利販賣接踵而來崇文門專理稅務僅於所屬口岸地方稽察恐尙未能周到仍著步軍統領五城御史於各門禁嚴密訪查一有緝獲卽當按律懲治並將其煙物毀棄至閩粵出產之地並著該督撫關差查禁斷其來源毋得視爲具文任其偷漏○調董教增爲陝西巡撫以廣厚爲安徽巡撫穆克登布爲浙江布政使靈保爲江蘇按察使由湖南岳常澄道遷○辛酉博興以疾免以佛爾卿額爲理藩院尙書由都統遷○癸亥上親耕藉田○甲子上啓鑾謁東陵○免經過地方額賦十分之三○己巳上謁昭西陵孝陵孝東陵景陵裕陵回鑾○丁丑諭軍機大臣等百齡等奏粵洋巨盜張保仔香山二等

畏罪乞降先令鄭一妓卽鄭石氏來省繼將各家口送省一併安置見據稟報幫船二百七十八號夥黨一萬五六千人全赴香山縣之芙蓉沙海口聽候收驗投誠並百齡親往查辦緣由一摺洋盜本係內地民人不過因餬口缺乏無計謀生遂相率下洋往來掠食伊等愚蠢無知但知趁此營生亦不干犯王法歲月旣久愈聚愈多甚至不服擄拏冒死抗拒自百齡到粵以後遵旨斷其接濟水米火藥無從出洋而又圖聚鄉勇整飭兵威認真防範該匪等遂不能上岸掠食見在越南又不能銷賊生計窘迫半年以來各股盜匪皆紛紛棄械投誠而見在張保仔等大股賊匪亦率其夥黨前來乞降在伊等來降之意仍不過爲謀食起見並非真知大義自悔前愆但見在旣將船隻礮械悉數呈繳聽候點驗並將其家口人等先行送省登岸看其情節尙無虛僞若必拒而不許

轉致生反側之心亦非甯謐海洋之道且人數既眾亦不忍槩予
駢誅但其頭目夥黨有二萬餘人之多安置實屬不易旣不應按
口給糧又無給產養贍之理伊等爲求食而來若無從得食勢必
仍去而爲匪况前此節次投首之眾已有數千而此後投誠之人
尙恐不止於此必須妥爲籌畫俱令口食有資不再滋事設遇有
滋事者官能擒拏辦理不至棘手方爲萬全無弊見在百齡等稱
設法安插無稍疏虞伊等究竟如何設法之處卽悉心經理據實
奏聞至摺內稱張保仔等請留船二三十號下洋緝捕一節伊等
投誠之後情願隨同官兵出洋自效未爲不可但須散而不聚將
伊等分派各船交與妥幹將領留心鈐束使其人少勢孤不相聯
絡方爲妥協若竟准其自帶多船別爲一隊不但將來立功之後
礙難驟加顯職且恐伊等因無人管束又復恣行不法劫掠商民

並藉稱奉官派往則查辦尤難此節亦關緊要百齡等務當布置周妥使之遵奉約束幫助官兵如果認真出力不妨量加獎勵若爲賊所害即可無庸置議也○戊子 上幸南苑行圍○庚辰增

福建福州駐防滿洲養育兵一百六十名○癸未 上還京師

夏四月丙申諭豐紳殷德前於嘉慶四年賞給公爵在散秩大臣上行走嗣因被已革長史奎福控告革去公爵賞以頭等侍衛補放副都統尙能勤慎供職復賞給伯爵銜近年來於一切差使俱能小心無誤見在抱病未痊著加恩賞給公爵銜用示眷念○丁

酉 上閱健銳營兵○庚子諭口外沿邊地方自康熙年間已有

內地民人在彼耕種居住百餘年來流寓漸多生齒益眾雍正元年以後節次添設官員見在吉林盛京直隸山西口外毗連一帶共設有一府一州五縣十二廳此內各廳有隸吉林將軍統轄者

有隸奉天府尹統轄者有隸山西巡撫統轄者至承德府所屬各州縣及宣化府口外三廳皆屬直隸總督統轄地方遼闊於吏治察覈刑名審轉諸多不便朕意當於熱河地方設一大員將承德府等處附近各屬專令統轄應如何改隸統屬並建置各事宜著大學士會同各該部妥議具奏尋議熱河原設副都統一員應請裁汰改設都統一員除管轄駐防官兵外所有附近一帶蒙古事件向屬稅員兼管者俱改歸該都統專辦惟查八溝三座塔烏蘭哈達三處向派理藩院司官各一員收稅塔子溝係八溝分口向派理藩院筆帖式一員收稅地方遼闊應添派司員將筆帖式撤回此四處請照察哈爾游牧理事司員之例俱改爲蒙古理事官爲都統之屬都統衙門應添設筆帖式二員至民人租種蒙古地畝向無存官冊檔自應及時清釐並交理藩院行文該盟長扎薩

克等諭以 皇上軫念蒙古久遠生計慮及開墾益多有妨遊牧嗣後各部落內除先經開墾地畝外不准再有私招民人開墾之事見在該處聚集民人既有十萬八千六百餘戶應責成理事司員州縣等嚴查勿令再添外來流民庶可杜蒙古地畝逐日增墾其窮苦者得以葦息牧產流寓民人安居耕種該扎薩克等亦長得租銀津貼辦公一切均有裨益從之○諭軍機大臣等張師誠奏洋盜悔罪投首分別辦理一摺洋盜沈帶悔罪投誠並將船隻礮械呈繳尙非怙惡不悛可以寬其一綫所有沈帶等首夥三百一十名著加恩均免其治罪卽照該撫所請酌留三十名出洋配緝餘俱妥爲安插又據另摺奏聞洋近日雖無大幫匪船其小仁及鳳尾等幫尙有餘匪目前剿捕更比從前緊要等語所見甚是此等零匪雖非大幫可比然不早爲撲滅則日久勾結又致漸成

大幫必須悉數殲除不可因投誠者多稍爲鬆勁近日廣東盜夥投誠者竟至有數萬人未免存招致之見殊爲懸慮此等海洋劇盜人數既眾心各不齊安能保其不再滋事是此時該省餘匪竟當悉力剿捕方爲正辦張師誠卽一面札會督臣一面嚴飭各鎮將分投剿捕期於辦理淨盡儘領將等泄泄從事卽嚴行參辦俾知儆戒○遣侍郎英和帶領侍衛十員往奠故固倫額駙豐紳殷德茶酒賞銀五千兩治喪照公爵銜賜卹○辛丑諭軍機大臣等百齡等奏盜首張保率眾投誠一招張保懇乞內投出於真情見據該督等准其投首止可如此辦理惟張保請賞留船隻隨同舟師緝捕一節此斷不可行該降匪等果欲立功報效應俟首繳船械後將伊等另配兵船派赴前敵既資其力又可藉以鈐制如有傷亡加以卹賞其奮勇當先殲擒多盜者予以官職用示鼓勵方

爲正辦若聽伊等管帶原船自成一隊不特洋面遼闊難以約束
卽使伊等實心報效屢有擒斬是專賴降匪之力用之緝捕官兵
竟成虛設豈不爲其輕視傷再生反側官兵亦不肯出力尙復成
何政體且人數眾多安能保其悔罪之心盡皆如一設日久衣食
無資又復出而爲匪此實必有之事必然之理總須要爲安插使
其各圖生計安分守法不至再生事端爲要○己酉召李銘來京
以齊布森爲廣西布政使

由戶部主事遷

○乙卯

皇后行躬桑禮

五月戊午諭前因給事中胡大成參奏川省匿名指訐督藩款蹟
一摺派令托津等前往查辦據稱訪查蜀都賦及對聯起於十四
年正二月間勒保曾經巡捕官拾取聯句稟知因查詢無據旋卽
寢息朕以此事勒保旣早知覺因何不行奏聞當降旨令其明白
覆奏茲據稱蜀都賦實無所聞賦內所云何事亦無從懸揣其拾

取聯句所指係賁打生員彭述軒及細縛知縣王應辰二事勒保
因俱參辦有案是以未奏迨來京祝嘏又以事屬已往不敢上清
宸聰等語勒保身任封圻既知匿名聯對所言款蹟於己有涉自
應奏明查拏嚴究方爲正辦乃隱忍不言已屬咎無可辭迨降旨
詢問勒保惟稱萬分悚懼愧汗交流並不自請議處勒保豈竟以
此二事不應陳奏耶此案匿名控訐編寫賦聯見交托津等確切
訪查將來無論虛實勒保已先有應奏不奏之處著交部議處○
壬戌諭軍機大臣等溫承惠奏直隸河淀淤墊情形一摺畿輔水
利關係民生必須盡心講求通盤籌辦今唐河等河七十二川之
水向之由西淀入東淀分三股下注者近年自趙北口十二連橋
以外已多淤墊又北股中股悉皆淤塞僅存南股一綫單渠以洩
上游諸大川之水其勢自難容納而東淀下游至楊家河一帶二

百餘里又復節節淤淺以致上游往往潰決附近各州縣村莊地畝處處被淹小民種藝無成逃荒失業每年議蠲議賑補救不遑而各處大道通衢亦常被水淹漫以致車馬不便有礙經行殊非體制溫承惠摺內稱計需數百萬金一時礙難請撥且南河大工尙在未竣應俟經費充裕再行辦理今先委員將趙北口以下淤沙擇其至要之處相機疏導並勸用民力辦理等語所見尙淺國家經費有常原不可以濫用然關繫生民要務則雖多不容靳惜若如溫承惠之意必俟南河一切工竣始行興辦則南河工程甚多難以克期辦竣豈有因此而令畿輔要工日久延誤之理至於民力有限勢必不敷徒滋科派之累此事竟當通籌全局發帑興辦以籌水利而衛民生因思天津鹽務加價一項本爲南河辦工而設今卽移以辦直隸河工同係正用此外尙有天津關稅一項

著溫承惠卽與嵩年會查此兩項每年應解戶部內務府者共有若干直隸籌辦水利通計實需銀兩若干幾年可敷辦竣著覈算明晰據實奏聞候朕降旨施行○癸亥諭本日吏部奏議處勒保照例應行降三級調用無級可降請旨革任一摺勒保仰蒙 皇考高宗純皇帝簡任有年從前曾因辦事獲譴仍蒙 聖恩錄用游陟封圻辦理軍務因勦捕狝苗出力封授侯爵嗣後派令勦辦邪匪據奏生擒賊首王三槐晉封公爵 鴻施優渥寵越尋常迨朕親政之後特授以經略重任勒保辦賊遲誤且聞王三槐本係自行投出當經革職逮問其獲罪甚重非尋常過失可比朕念其熟悉川省情形棄瑕甄錄不數年閒仍擢至四川總督游錫崇封當大功戡定之辰晉爵一等伯上年冬閒有大學士缺出因念頻年川省地方甯輯特將勒保格外加恩未經協辦卽補放大學士

勒保身沐 先朝恩澤又疊次受朕厚恩宜何如實心圖報纖悉無隱乃本年給事中胡大成參奏川省有匿名指訐之案朕派令托津等前往查辦據奏勒保在蜀之時卽曾經伊巡捕官拾獲聯對向伊告知伊查詢無據寢息不辦等語此係伊干涉本身之事被人指摘卽使查辦無獲亦應據實奏明乃勒保當時既不具奏及至上年祝嘏到京經朕召對多次亦從無一字提及迨此時降旨垂問勒保無論事之虛實其前次不行陳奏之罪總無可解免一經接奉諭旨甯不當據誠後奏自請處分乃伊前日奏覆之摺止於摺尾鋪敘悚懼惶恐汗數言並不自請議處是竟毫無待罪之意亦太不知朕恩矣此事除俟托津等查明虛實再行覈辦外勒保此時豈尙可覲任綸扉著革去大學士念伊究有軍功暫降補工部尙書以觀後效祿康曾任大學士加太子少保銜上年因三

庫有冒領銀物一案將伊降調但究係失察公過著加恩仍復還
東閣大學士太子少保銜著管理吏部事務慶桂著管理戶部事
務明亮著以兵部尚書協辦大學士其祿康所遺戶部尚書員缺
著托津調補托津未回京以前著瑚圖禮暫行兼署因思漢大學
士一缺亦應補放戴衢亨卽著加恩補授大學士兼理工部事務
仍掌翰林院事費淳上年亦係因三庫冒領銀物案內失察降調
所有工部尚書員缺著加恩卽將費淳補授至勒保未到京以前
所有工部滿洲尚書事務仍著秀林兼署○以宋銘爲兵部右侍

郎由順天府尹遷

○乙丑諭軍機大臣等本日據吳璥奏漕運關繫至

要河口通塞靡常酌擬剝運江廣各幫俾免誤漕兼利河務所奏
不爲無見河漕本相輔而行而經權須相濟而理所有試辦海運
一節旣屬格礙難行而欲求河漕兩治之道總不免於兩妨似此

年復一年無日不籌治河亦無時不虞誤通正不可不隨時酌劑
量爲變通江浙各幫於春夏之交趕緊渡黃尚可無虞淤阻江廣
船身笨重最爲滯累該三省漕船共計十九幫若徑用剝船分截
則全漕抵通較易而江浙回空得免江廣阻壓之虞自可邇年起
早一交大汛如黃高於淮卽堵閉禦黃壩使清水由運河暢注而
黃水亦全力東趨以黃刷黃以清刷運皆可日漸深通如此權宜
籌辦或於漕運河防兩有神益至計需剝船二千隻所需銀一百
萬亦尙易於集事一俟河道順暢卽將此項剝船分交北河之天
津楊村東河之臨清汶上南河之邳宿等以備剝淺之用亦不爲
無濟其應如何籌辦之處著江南湖廣江西各督撫會同漕運總
督妥議具奏○庚午諭大學士慶桂等奏會議江南總河吳璥等
通籌南河全局請次第修復舊規一摺朕詳加披閱內如惠濟閘

應行拆修王營減壩應行修復二款惠濟閘爲湖水入運關鍵王營減壩爲洩黃減漲要工原係必應趕修之款節年議定辦理總緣南河要工過多日不暇給以致展轉稽延河患愈甚此時實不可再遲著該河督等卽行趕辦一切照所議辦理此外請於大汛期內趲堵禦黃壩一款該督等係爲暫救倒灌起見頻年河患由於倒灌以爲濟運之資遂致弊不能除而計無所出今該督等奏請堵壩遏黃此於倒灌之弊誠可稍減而漕船未經過竣又將如何飛輓且重運回空源源來去卽暫時堵閉於河務大局又有何益前日據吳璥奏請將江廣各幫在清江一帶過壩剝運已交江南江西河南山東各督撫及漕運總督會同妥議本日南漕御史程國仁所請亦大略相同各督撫等均受重恩地方河漕原應無分彼此相助爲理今河漕旣勢難並治其應如何及早籌畫俾漕

運不至淺阻河工得以措手兩無妨礙之處速行設法辦理勿僅
恃借黃濟運暫時堵閉爲良策也至於修復毛城鋪石壩一款毛
城鋪壩基近日寬至五十丈已非靳輔舊制節次啓放屢有漫口
吸溜之事兼恐經由入湖之路日漸停淤非當日情形可比儻一
經壅塞潰漫則下游受害必多是以前經查勘未行今該督等謂
非此不能減洩盛漲且有此更可助益湖水並以從前係因冬春
水弱時啓放以致正河停淤今遵舊制止於盛漲時酌量啓放自
可有益無損等語事關河工救弊之策不厭周詳究竟該督等是
否能必其啓放後不致旋生他患如果確有把握再行詳細具奏
候旨辦理又高堰碎石坦坡一事前此屢經議辦並曾試作有效
上年該督等業經奏明定議辦理今忽以分年砌作日久費繁又
欲改建高堰二隄以資重障二隄雖有舊形而較大隄形制卑狹

新土浮鬆焉能較石堰更爲得力且高堰爲淮揚數郡生靈保障
關係久遠該督等以碎石坦坡須七八年辦成勢難久待欲汲汲
於兩三年內趕辦二隄究竟高堰見在情形若何仍著該督等據
實直陳無稍隱飾以便定議辦理河漕關係國計民生至爲重大
該督等身膺鉅任自當顧及通盤乃無一日不言治河亦無一年
不虞誤運徒爲救弊補偏之說迄無一勞永逸之圖而又屢議屢
更忽行忽止殊鮮定見此次降旨之後該河督及各該督撫務當
悉心詳度協力經理勿涉游移勿存推諉以期河漕兩利方爲實
心任事之道不可畏難苟安僅以敷衍塞責也○辛未岳慶緣事
降調以顏檢爲雲南按察使○癸酉命戴衢亨爲體仁閣大學士
○乙亥以德文爲左副都御史

由太常寺卿遷

六月戊戌增設熱河都統缺裁副都統缺○辛丑以山西旱發倉

穀平糶○秀林以在將軍時不能查禁秋茂降副都統調瑚圖福

爲吏部尙書勅保爲刑部尙書以馬慧裕爲工部尙書常福爲工

部右侍郎

由總管內務府大臣遷

○壬寅以甘肅旱撥四川等省銀一百萬

兩備賑○辛亥諭前明舊制紫禁城內非特官員等不能輕至卽

大臣亦止在外聽宣不敢無事輒入其時宮庭之內狃於宴安延

僚召對絕少以致內外阻隔下情不能上達綱紀墮壞我朝革除

一切秕政首在通下情而宣上意每日宵衣視事召對臣僚周諮

庶政乃至外來道府等官亦俱准其親詣宮門遞摺請訓無不隨

時召對法良意美從無有堂廡隔絕之事然禁城重地咫尺辰垣

守衛不可不嚴體制不可不肅乃近來門禁廢弛各處直班官兵

全不認真管轄以致閒雜人等任意闖入毫無稽考卽如前日查

出膳房太監于進忠之姪得林在外膳房居住兩月投井身死該

直班之文武大臣官員等均全然未知可謂憤憤迨一經懲治之後則相率嚴緊紛紛查辦專向各太監下處檢察聞人以為認真查禁不過數日之後旋即因循怠玩況禁城之內如各王公大臣直班之處以及各館內閣文華殿中正殿各處豈別無閒雜之人容留居住何以不一律查辦槩行清理乎又朕昨由圓明園進宮時見神武門站班官兵在西邊管轄者尙爲嚴整至東首站班官兵之外則竟有無數閒人在巷口擁擠該官兵並不早爲驅逐此等諒係跟隨御前乾清門行走之人然或竟有外來閒人攪雜在內亦未可定在各王大臣等進內之時原不能不酌帶跟役但止須足供使令又何必隨從多人漫無限制以致閒人亦得冒充混入設其時遇有叩關等情成何事體朕又聞午門之外往往有市井閒人止圖行路省便穿走朝門來往自如無人過問並聞 壇

廟重地當朕行禮之時常有不及引避之人屏匿壇壝左近
在意窺望該管官員兵丁所司何事竟鬆懈至此不可不嚴切申
誡以杜將來嗣後各該處值班官兵以及該管大臣等務當隨時
隨地留心管轄不可仍前泄泄尤不可專務一時之嚴緊日久又
復懈弛至於進內之各王大臣文武官員等並須各自檢束無得
多帶跟役稍令滋事如跟役內有不遵法度者一經挈獲惟伊主
是問其該管官兵有查察不嚴私情縱容等事並將該管大臣等
一併嚴行懲治不貸將此通諭知之○壬子諭百齡奏生擒積年
巨寇烏石二等首夥各犯並幫匪帶船投誠及盜首東海霸等悉
數乞降海洋肅清一摺披覽之下敬叩 天恩 考佑實深欣感
粵省盜匪在洋面肆劫已非一日百齡自簡任後實心經理振作
有爲嚴禁口岸杜絕接濟賊匪無處覓食日形窮蹙前此紛紛投

誠已有數萬惟西路烏石二等心持兩端仍行挑拒經百齡備造
船隻破位派撥官兵分路兜剿百齡雖未身臨前敵而親赴西路
督飭舟師紀律嚴明將弁等畏其聲望無不踴躍用命此次兵船
在儋州洋面追及烏石二等匪船童鎮陞黃飛鵬等卽揮令連環
攻擊經首民張保認定烏石二坐船奮勇偏擁首先跳過將該逆
生擒副將洪釐署都司胡佐朝委員花東苑周飛熊等將盜首烏
石三及賊目鄭耀章等擒獲其烏石大一船經孫全謀一意專注
親率弁兵過船又將該逆生擒並擒獲各犯共計四百九十名烏
石二等在洋遊奕日久稽誅今罪惡貫盈已按名俘獲百齡於訊
供後卽將該逆等予以寸磔實足以彰國憲而快人心此外臨陣
投出者計三千二十餘名又東海霸股匪三千四百餘名亦恐懼
乞降粵洋著名大股盜匪除投首外均已悉數殲除全省洋面一

律蕩平允宜特沛殊恩用昭懋賞百齡著加太子少保銜賞戴雙眼花翎給予二等輕車都尉世職童鎮陞著賞戴花翎給予雲騎尉世職韓封黃飛鵬著賞戴花翎交部議敘隨同辦事之道員溫承志著賞給按察使銜並賞戴花翎朱爾廣額著賞戴花翎交部議敘藩司會煥臬司陳若霖亦著交部議敘孫全謀著賞帶花翎以遊擊超升副將洪璽署都司胡佐朝俱賞戴花翎交部議敘委員花東苑周飛熊俱著賞帶藍翎交部議敘千總頂帶張保著賞戴花翎以守備超升並著將此次在事出力官弁查明分別等次保奏其兵丁內尤爲出力者亦著查明保奏其稍次出力者賞給一月錢糧以示獎勵至見在投出之盜首東海霸及賊目財富等十二名百齡請照洋盜案內免死本罪發往黑龍江給打牲索倫達呼爾爲奴實屬罪所應得但念東海霸久有歸誠之意因被烏

石二等挾制不能及早登岸其情尙有可原加恩免其發遣遞籍安置用示法外施仁之意並著百齡宣諭東海霸等以伊等在洋肆劫積年稔惡即使畏罪乞降尙應貸死遠戍今蒙逾格天恩並將遣罪一併寬免爾等當更加感激回籍後安分守業勉作良民儻敢滋生事端必當從重嚴懲不能再爲寬宥也見在洋面業已肅清該督等仍當整飭營伍振興吏治俾閭閻各安生理漸返淳風不得以巨愆已除稍存懈忽將此通諭中外知之○釋吳熊光同京以六部主事用○復那彥成一品頂帶

東華續錄

嘉慶三十

臣王先謙敬編

臣周福蕃恭校

秋七月甲寅諭軍機大臣等本日松筠吳璥等奏漕船全數渡黃
亞趕辦要工請撥銀兩各摺國家經理大事總當握其要領專心
一意方克有濟卽如醫家治病遇有棘手之證若不究其受病根
源率行下藥雖多方療治其病不除從前辦理教匪則堅壁清野
爲要其初游移不辦領兵將帥惟知一味散漫追捕以致數年不
能集事迨後修築堡寨之議行而大功旋卽告竣又如辦理洋匪
則以杜絕接濟爲要閩粵等省水師日久無功一經陸路將水米
認真斷絕賊勢頓形窮迫首夥各犯悉皆殲斃其投誠者亦皆安
插海疆甯謐實爲明效大驗因思辦理河工亦然全河扼要之處

全在海口暢流近年河工多事皆由海口淤塞下壅上潰百病俱生若果海口疏通則河湖之水皆有歸宿何至漫決爲患朕數年來屢次降旨飭辦海口而伊等相率泄泄總不肯認真疏導其節次挑挖亦皆有名無實徒費帑金以致尾閭不通漫溢如故甚至見旁趨漫溢之水輒妄希更改正河因循觀望徒致耽延本年朕已照伊等所請定議舉辦而見在糧艘已全數渡黃又目下大汛時河湖一切工程幸臻平穩天時人事極爲應手實不可再有游移伊等若謂帑項不敷則本日已照伊等所請之項全行撥給卽日可期到工無虞支絀更有何棘手之處該督等惟當立心堅定加意奮興勿聽浮言勿萌怠志和衷協力共成大功見在松筠回省審辦案件吳璥在河口堰盱一帶督辦宜防徐端已馳赴海口覆行查勘所有應行挑挖之處及籌辦料物著卽迅速妥定章程

立時興辦務將引河挑濬深通則將來漫口堵閉之後全河水勢順軌暢行南河自永慶安瀾矣勉之○以漕船全數渡黃復吳璥太子少保花翎徐端二品頂帶花翎○壬戌諭大學士慶桂等奏酌改票擬章程一摺據稱各督撫違例揀員升調本內如將該員平日官聲政績臚敘詳明確鑒可據者仍擬雙籤其籠統保奏並無實蹟者槩照部駁票擬單籤等語各督撫揀選升調人員定例參罰案件止准在十案以內原以處分過多即不應保舉若不論任內所有處分之輕重多寡但以各督撫臚列該員政績爲斷則該督撫於處分過多之員自不難加以鋪敘亦仍屬具文嗣後該大學士等於票擬部駁升調本內如處分在十案以外而內有案情重大者卽著票擬單籤並將該員處分案由開單一併呈覽如僅止尋常參罰之案亦止於處分十五案以內者票擬雙籤其逾

十五案者槩票單籤○直隸永定河溢○癸亥諭方維甸張師誠奏小仁等幫首夥率眾投誠分別辦理一摺閩洋自蔡牽殲斃之後餘黨離散今其夥犯陳贊等帶同蔡牽義子小仁文幅率眾投誠又夥犯吳淡曲蹄幅二人亦相率乞投各將船隻器械全行交出共計首夥一千三百餘名船六隻大小礮五十餘門並鳥槍器械等四十餘件閱摺內所敘該犯等情詞哀切出於至誠自當一律加恩准其投首至小仁等各犯方維甸摺內仍分別定擬具奏因屬按律辦理但所擬未免過重小仁文幅二人雖係蔡牽義子但小仁親生父母即被蔡牽殺害其時小仁年甫九歲不知原委被蔡牽收爲義子直至蔡牽死後其管事陳贊告知始悉前情隨日夜啼哭與陳贊等商量投出又文幅亦本係蔡牽船上舵工之子伊親父故時尚在襁褓之中被蔡牽收爲義子見在年止七歲

此二人本非逆犯之子不必緣坐且暑齡被劫久陷賊中情殊可憫今皆自行投出竟當免罪釋放妥爲安插其吳三池一犯雖曾被蔡牽封爲僞職隨同滋擾但今已畏罪投誠其翁吟一犯雖經隨同蔡牽打仗其後畏懼落後不過在小仁船上寫帳今已悔罪投誠其情罪皆可末減吳三池著發往黑龍江翁吟著發往伊犁其餘各從犯均著照該督撫所請擇精壯者三十餘人分配兵船令其隨緝餘俱遞籍安插但須散而不聚免致滋生事端設有滋事之徒卽從嚴懲辦不可姑息又據另片奏朱渥隨同舟師緝捕奮勉請旨酌量施恩等語朱渥投誠以後隨同兵船出洋頗知感奮今能跳過盜船擊獲多犯尙屬出力著加恩賞拔把總以示鼓勵所有此次擊獲各犯均著審明覈辦其出力弁兵人等並著詳查奏明分別獎勵○王申 上啓鑾秋獮木蘭○免經過地方額

賦十分之三○癸酉秀林以侵用濫餘銀奪職逮問○乙亥普恭

緣事降調轉成書爲兵部左侍郎調成格爲兵部右侍郎以德文

爲禮部右侍郎

由左副都御史遷

○丙子諭近來諸臣內執法者少廢法

者多大率不肯存任怨之心而惟知蹈市恩之習夫立法創自

祖宗百餘年來奉行勿替朕祇守

成憲諸臣卽皆係佐朕執法

之人自當有善同賞有惡共罰况本朝法度公平一切斷罪論刑

從無過嚴失當之舉設使有過嚴失當者諸臣亦惟當執法論奏

苟所奏得當朕亦無不權衡未減豈有陽奉陰違私向罪人昵比

之理卽如近日查出綢武布等獲罪之後發往吉林秀林等竟爲

之代修住房伙助盤費並且爲之措繳官項甚至餽送節禮多次

風聞各處遣戍官犯並有與將軍並坐共食者豈不可駭朕於臣

下所犯罪名區別詳慎其罪不至死者按照定律分別軍流至於

大臣問擬遣戍者大率案情本重尙不至於死是以止坐謫戍令其備嘗艱苦至於日後或加恩釋回或令其多住數年或竟不准釋回皆必詳審再三歸於至當乃朕方令其折磨改悔而該處大臣轉爲經營曲庇安其服食便其起居俾得花消逸樂盡忘戍所之苦豈非背法而行必欲與朕意違拂乎且人情照應誰則能免果係舊交戚好見非執法之人逢有謫戍遠行解囊仗助此亦情事之常若秀林等正係該處執法大臣何得與本處罪人私相交往况其所給銀兩又非己貲不過將婪索贓私供其揮霍蓋緣伊等在彼亦自知營私敗檢之事難免人知豫恐發往之人釋回傳播既可藉此彌縫而又結交見好豫爲他日地步其居心豈復可問乎此等特旨發遣之人該處大員尙敢如此庇護無惑乎上行下效各處地方官於發遣流徙常犯皆一味博覽厚之名全不認

真管束以致在配脫逃者絡繹不絕如昨日廣西逃犯復來行在
叩關成何事體各省刑禁弛縱如此國法安在朕辦理刑政從不
肯有意從嚴天下臣民共知共見而大臣中乃敢市恩取悅徇私
廢公則是朕之所惡必欲庇之國之所棄必欲全之將憲典竟可
阻撓罪人無所儆懼朕豈肯以國家成法任伊等廢弛將來勢不
得不大加整頓激成猛以濟寬朕亦無如之何矣將此通諭內外
臣工其各屏去私心懷遵法度勿徇情邀譽自蹈重愆以副朕諄
諄訓誨至意○戊寅 上駐蹕避暑山莊○辛巳吳璥以疾免以
徐端爲江南河道總督裁副總河缺○以修復雲梯關外海口命
工部尙書馬慧裕督辦

八月丁亥命嗣後凡有指定額駙者無論貢舉各項出身均不准
再應鄉會試著爲令○以直隸水災撥奉天運京小米二十萬石

並命戶部撥近省銀三十萬兩備賑○吏部侍郎榮麟緣事降調

○貴慶緣事降調以薩彬圖爲盛京戶部侍郎由光祿寺卿遷○以哈魯

堪爲盛京兵部侍郎由大理寺卿遷○戊戌 上自避暑山莊巡幸木蘭

行圍○己亥以誠安爲左副都御史由太常寺卿遷○庚子調秀甯爲吏

部右侍郎轉德文爲禮部左侍郎以哈甯阿爲禮部右侍郎由內閣學士

遷○己酉左副都御史溫汝迺緣事降調○壬子諭軍機大臣等

百齡等奏籌議分船巡緝洋面章程一摺廣東洋面縣互數千里

近年來藏垢納污幾成盜藪自百齡到任以後嚴杜接濟大振兵

威將各路著名首夥大盜分別剿撫一律蕩除此次復籌議善後

章程分布各路師船責成巡緝所辦實爲周妥此時洋面肅清已

無大股盜匪但尋常劫奪小盜尙難保其必無若不隨時捕獲則

日久嘯聚恐又萌孽滋事百齡等務當督飭各鎮將等各於所管

洋面認真巡邏期於有盜必獲但聞弁兵等積習相仍往往於真盜不能捕獲轉將海濱無業貧民如漁船蟹戶人等妄拏報官塞責邀賞以致誅及無辜從前伍拉納在閩浙總督任內任性妄爲卽有此等情事最爲可恨百齡認真辦事見將粵洋巨盜收捕一空海疆甯謐勳績已成業經身膺懋賞其平素居心詳慎豈尙復存邀功之心朕亦斷不疑其有此但恐弁兵人等積習未除或妄拏滋事用是諄諄訓諭該督等惟當隨時密查凡於捕獲案犯必須詳細研鞫以期罰當厥辜設竟有妄拏邀功之人卽當嚴參辦理不可姑息仍不得任伊等藉口因循並真盜亦不認真臨捕經理方爲得宜其所議派員分設巡哨挑用船隻以及酌給捕盜口糧等項章程均照該督等所請行○增設廣東水師提督駐虎門改左翼鎮總兵官爲陽江鎮水師總兵官移駐陽江

九月乙卯諭軍機大臣等興安大嶺於塞北諸山最爲崇峻且靈應素著屢見於皇考高宗純皇帝聖製集中向來進哨以前必派親王帶領喇嘛兩次前往致祭本年朕行獮木蘭晴雨應時率昭順佑應加隆望秩以協懷柔著交禮部查明從前祀典內曾否載入如本有舊章卽將儀文節目詳錄具奏如未列祀典著禮部詳議崇祀卽不能與五嶽並尊亦應倣照四鎮之儀酌定典禮並擬定神位封號致祭時增設神輿書寫神牌供奉以昭虔敬奏定後載入則例永遠遵行尋議照列鎮之例每歲仲春派熱河都統望祭至仲秋行獮木蘭出行在禮部奏派王大臣致祭儻遇停止進哨之年仍令都統致祭從之○己未上駐蹕避暑山莊○壬戌諭本日召見廣東學政程國仁詢知該員係截取御史業經保送繁缺知府將來遇有應選之缺吏部仍行銓選此項出差人員

聞向例本不歸選惟從前吳蔭墮在陝甘學政任內曾選補直隸
州知州辦理殊屬錯誤學政係特派之員職任較重若仍照原職
歸班選用地方官轉將學政開缺於體制未爲允協程國仁著停
其銓選俟任滿後再照常歸選嗣後應行外選人員有簡任學差
者應照此辦理著爲令○允方維甸回籍養親調汪志伊爲閩浙
總督以馬慧裕爲湖廣總督調恭阿拉爲工部尙書以福慶爲體
部尙書轉常福爲工部左侍郎調成格爲工部右侍郎以明志爲
兵部右侍郎由內閣
學士遷○癸亥 上自避暑山莊回鑾○甲子永定
河漫口合龍○以文甯爲內閣學士由大理寺
少卿遷○己巳 上還京
師○庚午以榮麟爲內閣學士降調
侍郎○乙亥增南河稽料價銀○
辛巳復山東漕船春兌春開

冬十月己丑理藩院侍郎策丹綠事解任○甲午江南高堰山圩

兩廳隄壩決漚徐端劄頂○諭軍機大臣等據徐端奏高堰山肝
兩廳漫決情形想吳璥在浙自早已得有信息高堰爲淮揚保障
要工今衝坍甌石工多至四千餘丈越隄過水固山湖水旺發風
暴狂烈實在人力難施而其受病根由諒非一日究因何潰決至
此吳璥久任河督年來親歷河干定能悉其原委見據徐端奏稱
先將下游歸江各閘壩並高郵之車邏大壩悉行開放俾免壅漲
一面擬將仁智兩壩先行趕堵其義壩掣通處所擬將兩頭盤護
仍留口門減洩隨後再爲趙堵一切隄工俟春融續辦此時工段
繁多處處著重亟應上緊趕辦但全河大局吳璥較徐端自爲熟
悉應否卽照徐端所奏辦理或吳璥另有所見著蔣攸銑傳旨詳
詢並酌帶醫生察看吳璥病勢如已就痊卽令緩程於歲內來京
以備詢問仍一面先行覆奏如尙未能就道卽著吳璥先將近年

河朔受病緣由及目今應如何籌辦之處據實具奏不可一字隱飾所遞之摺著交蔣攸銍山驛馳奏○乙未諭國家明罰敕法以罪辜之大小定刑律之重輕皆本 列祖 列宗權衡增損令典昭垂恪遵罔易如刑律內發遣之條其罪原在軍流以上至發遣爲奴則皆姦盜兇徒身干重典或同案人眾不忍聯誅除法無可貸外擇其情有可原者量減一等本係法外施仁去死一閒之人以故到配時令其充當苦差以磨折其兇狡之性定例一經逃逸拏獲卽行正法律意甚嚴乃前者秀林於召對時曾經奏及吉林發遣爲奴之犯到彼分給兵丁其人略具貲財向所分之主贖身以後卽聽其所往或擇地謀生或潛行逃遁及至點卯時查出而所給之主公然以業經贖身與伊無涉登覆其太監緣事發遣爲奴者亦以贖身在彼閒散自由且有置產經營者及釋回後反甘

心犯法情願再遣是以國家嚴懲罪人之例竟聽伊等私行賣放以致罪人無所敬畏以遠戍之地爲樂土豈不與立法之意大相刺謬乎至官員因事獲罪問擬遣戍亦必情節較重罰令親嘗艱苦稍贖罪愆乃近年以來有該管將軍與官犯並坐共食者代爲修理房舍致送節禮者徇情壞法相率效尤恬不爲怪甚至遣戍之員轉以在彼安逸毫無苦懼尙復成何事體夫賞功罰罪朝廷馭世之大柄人主從無私好私惡於其間其人有善可錄傳之於朝則同寅協恭卽屬天下之公好其人有惡當懲屏之遠方則執法明威卽屬天下之公惡豈容昵比罪人故與君上之好惡相背是欲一己博寬厚之名而不顧懲典之廢弛違道干譽國法安在著通諭將軍都統等該管地方凡有官常人犯發往爲奴及當差者俱遵照定例派撥令其服勤習苦其納贖贖身惡習嚴行禁止

經此次飭禁之後如有再犯者加倍治罪查係該管大臣徇私廢法從嚴究治如原給之主私行賣放者交該管官查明一併懲處朕祇循成憲詒誨諄諄爾將軍等其各懷遵毋忽○丙申轉蘇

沖阿爲理藩院左侍郎以成林爲理藩院右侍郎

由副都統遷

○丁酉

定宗人府翰林院通政司詹事府太常寺光祿寺太僕寺鴻臚寺

國子監欽天監各衙門冬三月輪班值日例○己亥以廣玉爲浙

江布政使劉大懿爲福建按察使

前任甘肅按察使

○辛丑諭萬承風具

題學政任滿一本朕詳加披覽其年月未經另葉書寫已照擬飭行矣至其所書前銜有內廷供奉字樣尤爲不合會典所載官職本無此等名目若萬承風因在上書房行走則周系英黃錢俱係上書房南書房行走之員同日具題接替學政各本並未列有內廷供奉前銜萬承風何得任意形諸章奏著交部察議伊原係上

書房行走本欲俟到京之日仍令其在上書房行走今觀其情形念念不忘內廷殊屬躁妄不必在內廷行走嗣後凡在內廷行走人員於奏牘內止列本銜不得再書內廷供奉字樣以符體制○癸卯諭軍機大臣等近年以來南河工程所費帑金不下數千萬兩而漫工倒灌歲有其事偶值風雨卽不能防守平穩且每有一處漫工遂請帑大辦其歲搶修銀仍不能少減無日不言治河究之毫無功效朕爲民生運務日夜焦勞原不惜多用帑金惟於國事有濟卽千百萬不爲濫費若置之無用之地雖銖兩亦屬虛糜因思節年所發帑項或未必盡實用在工又有如從前莊剛劉晉偕端侵蝕私飽囊橐者不可不加確覈著松筠密行查訪自吳璥徐端以至道廳營汛等官其中有無借工支銷將所領帑項上下朋分及私侵入己者一經得有實據卽據實密奏朕將大加懲創

置之重典以除積弊若係辦理不得其當矣興無益工程以致帑
項多歸虛擲亦應據實奏聞但不許籠統聲敘以虛言覆奏總須
查明某項工程如何不應興修係某員經手濫用帑項若干逐案
指明以憑究辦松筠素日辦事公正且係新到江省從前各工均
未經手卽留心密查或遴選親信之人察訪亦不限以時日查得
時卽行密奏毋稍隱諱將此密諭知之○戊申以禧恩爲內閣學
士由奉宸苑卿遷帥承瀛爲左副都御史由通政使遷○庚戌增設太常寺學
習贊禮郎三員讀祝官三員

十一月壬子朔諭賽冲阿等奏查辦吉林長春兩廳流民一摺據
稱吉林廳查出新來流民一千四百五十九戶長春廳查出新來
流民六千九百五十三戶等語流民出口節經降旨查禁各該管
官總未實力奉行以致每查辦一次輒增出新來流民數千戶之

多總以該流民等業已聚族相安驟難驅逐爲詞仍予入冊安插再屆查辦復然是查辦流民一節竟成具文試思此等流民多至數千戶豈一時所能聚集該地方官果能於入境之始認真稽察何難卽時驅逐且各該流民經過關隘處所若守口員弁果能嚴密稽察何能挈族偷越各該管官種種廢弛於此可見除此次吉林長春兩廳查出流民姑照所請入冊安置外嗣後責成該將軍等督率廳員實力查禁毋許再增添流民一戶如再有續至流民訊從何關口經過者卽將該守口官參處至長春廳民人向係租種郭爾羅斯地畝兼著理藩院飭知該盟長扎薩克等將見經開墾地畝及租地民人查明確數報院存案嗣後毋許招致一人增墾一畝如有陽奉陰違續招民人增墾地畝者卽交該將軍咨明理藩院參奏辦理○乙卯諭軍機大臣等前因山盱三壩掣通過

水石工塌卸數千丈河工處處著重特降旨詢問吳璥茲據吳璥
縷悉覆奏其所論甚屬切要朕詢問在廷諸臣卽不諳河工者所
言大略相同此時自應以速堵義壩爲最要之務據前日徐端所
奏仁壩日內自己堵合水勢專注義壩該處塘深水急堵築斷不
可再遲徐端前奏期於本月二十日內外堵閉斷流已有旨令其
趕早數日務當上緊趲辦尤須工堅料實若再有滲漏湖水外洩
日多河口倒灌益甚明歲刷黃濟運將何所恃徐端不可不慎之
又愼勉力辦理至高堰石工場至四千餘丈隄身狹窄情形自爲
著重總須於明年大汛以前一律補砌全竣以資保障其隄工石
料被風浪掣卸仍不過沈落湖濱左近損失不至過多著卽一面
著落該廳員等按段打撈覈計不足應行購備者今冬卽上緊採
備齊全毋誤春融興工剋期歲事其海口挑工吳璥以爲黃水場

出則洪湖河口之病悉除徐端並隨時知會馬慧裕嚴飭工員實力挑挖寬深毋得稍有偷減○壬戌賜秀林自裁○甲子諭軍機大臣等松筠密奏一摺朕詳加披閱內稱吳璥議論河務多有不實徐端止知作工欠曉機宜查伊二人任內經手工程如堰圩改建駝石各工老壩工改挑毛家背移建東清禦黃二壩回龍溝挑挖引河清口攔作閘堰種種辦理失宜峰山壩見又堵閉遲逾此外如毛城鋪率請修復海口仍稱高仰語皆摭飾又所用屬員如葉觀潮張文浩繆元滔等皆委任不當或應參不參應賠不賠以致各處工員無所儆畏見在卽查有墊款應領銀九十餘萬兩恐有虛捏報帳情弊必須查辦以杜浮冒等語近年河工費用帑銀多至數千萬迄無成功其中自難保無弊混失當之事松筠所奏各款著卽秉公參奏朕自當執法辦理至摺內稱懇請將伊調補

總河以便查弊並可遴選工員講求河務等語河工敝壞已極正當辦理棘手之時人人視爲畏途松筠見任總督管理地方不但藉詞推諉轉肯銳意自任毫不畏難全是一片公忠實心爲國覽奏實爲可嘉但河工與地方究有不同經理機宜實非易易松筠雖能實心任事而於河務素非所長且廳營中不肖者甚多其詭詐伎倆無所不至設見松筠接手之後諸事生疏因而假公濟私乘機恣憑弊混多端萬一稍有貽誤則松筠徒然爲其所累仍於公事無益此時徐端已明降諭旨革職留工次效用其總河一缺旣據松筠另片奏稱蔣攸銍可勝斯任已降旨將蔣攸銍補授俟伊到任之後松筠惟當與之實心講求相助爲理並將河工各弊端會同查奏可也○徐端以不勝任革職留工效力以蔣攸銍爲江南河道總督訓同興爲浙江巡撫錢楷爲湖北巡撫以成林

爲廣西巡撫本智爲理藩院右侍郎

由京營右翼總兵遷

○調張映漢爲山

西布政使素納爲湖北布政使○乙丑調陳頌爲廣西布政使齊

布森爲貴州布政使○戊辰諭軍機大臣等松筠在河口督催漕

船俱懸立重賞每幫勒限趲渡或數百兩或一二千兩均立時賞

給因此人夫踴躍本年重趲得以無誤見在同空亦如此辦理松

筠自係爲力趲漕運起見但此項賞銀出於何處計其爲數不少

非養廉所能敷用松筠操守清廉朕所深信斷不疑其取自官民

自係向人借貸但借貸銀兩將來必須完欠松筠何得不豫爲計

及卽如阿克當阿近在兩淮若松筠係向伊借用則伊又豈能解

囊借與勢不得不藉資商力又與取之於民何異此更不可況賞

之一事非可濫施賞之得當則人皆感奮過濫則視爲泛常弁兵

夫役人等始而見利爭趨人人忻悅久之視同常例勢將非賞不

行且賞亦不見恩不賞卽易見怨運船淺阻地方本所時有惟在
認真催趲隨時相機其得賞而可以輓渡者可見不賞亦未必停
關全在人夫之是否出力辦理之能否得法耳若專以賞項爲事
則年復一年何所底止恐弁兵夫役人等邀求重賞別生不肖之
心甚或於運船可以暢行之時亦復藉稱淺阻賞重則照常輓渡
賞薄則觀望不前作僞多端易生流弊松筠不可不防今歲河口
阻滯伊權宜辦理亦已成事不說嗣後務當別爲相機經理期臻
經久可行不得專以懸賞爲事也○甲戌論據阿克當阿奏稱前
任揚河通判繆元澹於本年承辦揚河隄岸工程共領銀五六千
兩止用錢一千八百餘串人言藉藉無不切齒痛恨等語近年南
河糜帑甚多而工程仍未能保護平穩意工員內自必有草率偷
減情事今果查有此案弊端亟應徹底究訊繆元澹已因另案革

職著托津初彭齡前往查辦傳旨拏問嚴審定擬具奏吳璥此時病體就痊自己來至清江並著會同查辦勿稍瞻徇回護看來河工此等弊端尙多未必止繆元淳一人如續經查出另案浮冒之處卽行嚴參辦理見據阿克當阿指內稱本年吳璥路過揚州時曾向伊述及廳員營弁中誠實者少不肖者多不願無事止求有工曾有人稟報工程一段伊親往查看直不用辦又如外河廳同知王世臣承辦土壩一段伊親往查勘將壩創開止有一半工程更有並未辦工之人輒具稟先行借支銀兩以便私用云俟將來辦工時再行扣除自係從前有人辦過方敢如此肆行無忌又伊從前修辦四五座壩工止用銀十萬兩上下如今修辦一壩竟用至十餘萬兩伊在任前後六七年止用銀一千餘萬此數年來竟用過三四千萬實在可怕因此晝夜焦急病勢益劇等語吳璥既

知此等弊端何以不行參奏除一面降旨飭詢外著托津初彭齡
於到彼後會同松筠蔣攸銛將此數年來河工用過款項通行覈
實鈎稽如查有弊混之處卽行參辦其吳璥稱虛報工段者何人
稟借銀兩者何人並著逐一指出同辦工偷減一半之王世臣一
併查明參奏歸案覈辦至阿克當阿於河工弊竇既有聞見著於
查收海口工竣卽行回赴清江將摺內指陳各條以及續行訪聞
一切確實憑據俱面告托津等以憑按款查辦○乙亥改湖北襄
陽府樊城同知爲鹽捕同知移宜昌漁洋關同知駐歸州新灘改
歸州州判爲隨州唐縣鎮州判隨州唐縣鎮巡檢爲東湖縣南沱
巡檢○庚辰溫承惠以給賑延玩降二品頂帶觀花翎

十二月甲申泰瀛以疾免調朱銘爲刑部右侍郎以胡長齡爲兵

部右侍郎

由左副都御史遷

○癸巳以曹師曾爲左副都御史

由大理寺卿遷

○

甲午調福昂爲江蘇按察使靈保爲直隸按察使○乙未洪湖義
場合龍○丙申賞廣西一百四十二歲壽民藍祥四品頂帶 御
製詩章 御書扁額加賞銀五十兩○丁酉馬慧裕奏雲梯關外
馬港口大工合龍黃河由正道歸海得旨嘉獎下部優敘○己亥
諭前因江南河務緊要河督一缺簡任乏人特降旨將蔣攸銍補
授該撫一聞恩命卽起程前赴新任而於謝恩摺內附陳未諳河
工深恐才不勝任婉轉懇辭朕以蔣攸銍辦事認真於河防雖非
素習必能盡心講求力圖成效是以未經允准本日蔣攸銍奏報
接印日期摺內附片稱見雖接手經理一切俱非所諳貿然從事
無所適從恐一有貽誤關繫甚重等語情詞懇切出於至誠看來
蔣攸銍於河務實不能知一時驟難諳習初非存心推諉見在工
程敝壞之時事事均資整頓儻稍有貽誤蔣攸銍一身獲咎所關

猶小而全河利弊繫乎民生國計者甚大此正所謂學而後入政非可以政學也蔣攸銑竟不必強令任事伊在巡撫任內整理地方官聲本好著仍回浙江原任所有江南河道總督著陳鳳翔調補其河東河道總督著李亨特補授所遺永定河道員缺著溫承惠於諳練河務人員內保舉二員候朕簡補至李亨特到任尙需時日陳鳳翔奉旨後應卽馳赴新任所有河東河道總督印務交吉綸暫行兼署貴州巡撫鄂雲布見已年老著來京另候簡用其員缺卽著同興調補○諭軍機大臣等江南河道總督員缺因陳鳳翔熟諳河工已加恩簡用南河敝壞已久河湖受病日深而究其受病之源皆由底高淤墊所致蓋黃水挾沙而行非清水不能刷滌而欲多蓄清水非堰工堅固不能保無漫溢之虞年來論治河者咸以海口未經復舊下游不能通暢以致黃水倒灌運河非

特運河受淤而黃河挾沙帶泥下游亦日增淤墊甚至海口阻塞
尾閘不通譬諸人之一身無往非病經朕力持定見已將海口挑
挖深通堵塞馬港旁趨之路見在河水滔滔東注更無壅遏之虞
惟清口倒灌乃全河痼弊昨據馬慧裕奏馬港合龍之後河水消
落三尺有餘未知所報何處若清口一帶亦一併消落此時清水
遂能高於黃水自可暢出刷黃則事機已臻順利設河水雖已消
落而清水仍不能外注則是該處一帶河底墊高清水被其壅遏
其爲患在咽喉胸膈之間不能宣暢並不專在於尾閘明矣見屆
清水力絀之候即使多方籌蓄而一兩月之間豈能卽高於河身
轉瞬重運經臨清水壅遏不出勢必仍須借黃濟運明知倒灌之
害而不能不開門揖盜其弊將何可勝言卽見在海口費數百萬
帑金挑挖深通亦仍歸無益朕思此時全河大局全在蓄清敵黃

去其淤墊使清水無旁洩之途黃河絕倒灌之路方能日有起色至蓄清要法則先須修復高堰隄工所有風掣石工四千餘丈亟須大汛前一律修整完固然後有恃無恐見在海口除善後工需之外尙餘存銀三十五萬兩並有餘存估價三十餘萬之料物陳鳳翔到彼接收後即將此項存銀迅速購料興工將堰圩工程剋期辦竣庶將來清水力旺不至旁洩以之刷黃利運可收專注之功再此時禦黃壩旣議堵閉必當使黃水涓滴不能入運方克有濟來春如果清水暢出運河已覺高於黃水北來重運可以照常進行固屬甚善儻或清水仍有淤滯湖水不能卽時蓄高來歲重運北來一將禦黃壩啓放黃水依然倒灌則又於事何益夫清河本屬相需今因利漕先已病河權其輕重甯使暫時剝運渡黃必不可復用借黃濟運之計以致倒灌增病前年吳璥所奏剝運事

宜章程具在且湖廣江西創船俱已次第成造陳鳳翔惟當力持
定見通盤籌畫勿稍游移仍將河口積淤設法消除俾河身日低
清水日高全力下注因勢利導實爲尋源探本之法朕於治河諸
督並未多閱惟恭讀 列祖 列宗實錄於治河一事 訓誡昭
垂總以蓄清敵黃爲第一要義此時若不遵循辦理有何把握該
河督膺此重任惟當服膺 聖訓勿惑浮言實力實心持以敬慎
從此清強黃弱永慶安瀾日有起色勉之望之○辛丑勦平三省
邪匪方略成○是歲朝鮮暹羅來貢○會計天下民穀數各省通
共大小男婦三萬四千五百七十一萬七千二百一十四名口各
省通共存倉米穀三千一百四十四萬三千一百七十七石一升
二合一勺